





Extr. rare. grand de marges avec l'écriture














218

LES
MEDITATIONS
D'VN ADVOCAT
DE LA ROCHELLE.

M. DC. XXII.

818

Case

F

39

THE NEWBERRY
LIBRARY

326

1622 med

LES
MEDITATIONS D'VN
ADVOCAT DE LA
ROCHELLE.

Miserable fortune seras-tu toujours
sinistre à mes vœux, faut-il que no-
stre pauvre Eglise soit ainsi la proye du de-
stin, iusques à quant produirons nous nos
iours dans ces esclandres? iusques à quant
nostre miserable vie sera elle suiette à tant
& tant de malheurs? Ville infortunee, hélas!
combien endures tu de trauerses? combien
d'alarmes t'a on donnees depuis le com-
mencement de tes murs? que de maux as-tu
souffert parmy les tourmentes, qui t'ont agi-
tée, il semble à voir que le Ciel n'ait des fou-
dres que pour te faire escrouler dans la terre?
que la mer n'eust des tempestes que pour t'a-
bîmer? & que la terre n'aye pas de force
pour te soustenir. De tous costez on te pour-
suir, le Ciel, l'Air, la Mer, la Terre, ne cher-
chent que ta ruyne, tous les elemens sont
bandez contre toy, il n'y a rien qu'il ne te
soit contraire, de toutes parts tu es menacee,
chacun te presse, tout le monde te court sus:
miserable donc encor vn coup & infortu-
nee, puis que tu es destinee de tout temps à
tant de malheurs.

Tes commencemens, tes progrès & ta fin n'ont pris leur naissance que dans les calamitez, à peine à-on veu l'esleuement de tes murailles que les Anglois t'on pillée & saccagée, & des lors on te vid toute sanglante, ne respirer autre chose de ta premiere beauté qu'un malheur vniuersel, ton enclos auparauant si beau fut la carrière des furies communes, ou de tout costez la fortune te descochoit les traits de son ire, depuis a-on veu un siecle ou tu n'eus esté rauagée, s'est-il passé un lustre ou tu n'aye ressenty les pointes piquantes d'une fortune aduerse, on a tousiours minuté ta ruïne & coniaré ta demolition.

Quels maux souffris-tu encor du regne de Charles neuuiesme, quels reuers de fortune te donna-on pour lors, tes champs en sont encor tous sanglants, tes maisons rompuës, tes murs renuersez & la plus-part de tes anciennes familles coupees, & si avec verité, ie veux atteindre à l'origine & à la cause d'où sont sortis tant de malheurs, si atténuement & sans passion, ie veux considerer d'où tant de perils & de dangers ont puisé leur estre, ie trouueray ce que i'ay tousiours remarqué parmy tes Citoyens depuis quatre vingt ans que i'ay tramé ma vie dans ton enclos, sçauoir est, vne propension naturelle & vne inclination reueche à ne vouloir point de supérieur, & vne liberté trop auantageuse en toutes tes actiōs. Pour ce qui cōcerne le pre-

mier point on le peut voir depuis le temps
 que tu n'as voulu recognoistre aucun Sou-
 uerain sinon que superficiallement & à l'ex-
 terieur, on t'a sommé diuerses fois de ton
 deuoir : mais ny les iustes demandes de tes
 Roys, ny les punitions qu'il peuuent pren-
 dre de ta perfidie, ny les considerations de ce
 que tu es, ne t'ont iamais peu remettre dans
 la cognoissance de toy-mesme. Je l'ay veu
 depuis soixante annees à mon grand regret,
 & mes yeux ont estez tesmoins très assen-
 rez de tes reuoltes, aussi puis-ie dire avec ce
 grand Philosophe de l'antiquité. que ma vie
 n'est detrempee que dans vn ocean d'aduer-
 sité, puis qu'à mes yeux hélas ! ie suis con-
 traint de voir tant & tant de malheurs qui te
 trauerfent iournellement, & ce pour tes
 propres & intestines rebellions : Que ne fis-
 tu du temps de Charles neufiesme quand tu
 te vis presque ensevelie dans tes mutineries,
 combien de tes Citoyens moururent-ils en
 ce siege, quelle extorsion, ne t'imaginastu
 point secouer le ioug de l'obeyssance que tu
 dois à ton Prince. Aussi depuis ce temps là
 nous n'auons vescu qu'en continuelles alar-
 mes, le Ciel & la terre ont coniuéré contre
 nous, les soldats sont couru iusques dans
 nos portes & on la France iouyssoit du repos
 d'une paix delectable : c'estoit alors ou nous
 estions en plus grande incertitude : De sorte
 que nostre vie n'est nourrie & entretenue
 que parmy la crainte nous n'auons de la ioye

que dans nos aduersitez, & tout nostre contentement est tellement lié à nos infortunes que nous ne pouuons respirer que par les sanglots & viure que dans les larmes.

Mais les chocs les plus furieux que nous auons reffenty par la faute de tes Citoyens, les assauts les plus grands qui nous ont tourmenté depuis le commencement que l'heresie t'a choisie pour tutrice & nourrisse de ses enseignemens, ont pris leur origine depuis dix & douze ans : car comme le Roy LOVYS LE IVSTE ton souuerain Seigneur, de qui la Iustice reigle les mouuemens t'a demandé l'entree de sa ville, tes Citoyens ingrats qu'ils sont, de tât de priuileges & immunitéz à eux concedez, luy ont refusé & n'ont voulu plier le col sous le ioug de ses iustes demandes.

Aussi depuis ce temps le Ciel nous a bien tesmoigné qu'il protege les Roys, & qu'en vain on se rebelle contre eux. puis que helas, nous n'auons veu que nouueaux malheurs & que tempestes furieuses qui se sont creuees contre nostre insolence, que de maux nous a fait ce Duc Despernon, que de ravage a-il causé en ceste contree, combien de pauvres gens sont ils affligez pour nostre consideration, combien de familles ruynees de Chasteaux renuersez, tous les champs des enuironz sont despoillez, les villages & bourgades mises à bas, bref, toute ceste Prouinçe ne se plaint que de nos reuoltes, & en

cecy tu ressens la Iustice de Dieu & chacun void à l'œil qu'il prend la querelle des Roys puis qu'ils font ses images, & que s'attaquer à eux, c'est se prendre à sa Majesté diuine. Comme de fait, tout ce que nous auons entrepris toutes nos pratiques, monopolles, assemblees, coniurations, menées sacrettes & intentions ne sont iamais resiaillies qu'à nostre desaduantage aux lieux ou nostre esperance s'estoit imaginee vn heureux succez de nos affaires, ça esté ou nous n'auons trouué qu'une publique desolation.

Quand ie pense à la deffaite de l'Isle de Rié, ou i'ay perdu mon Aîné, hélas ie ne peux tarir mes yeux, les soursirs se creuent dans ma bouche, & ma langue à peine peut elle trouuer des plaintes, pour declarer l'angoisse que mon ame ressent au dedans de son interieur pour la triste iournee ou ie perdis ce qui me restoit pour me consoler en mes vieux iours, qui de nous autres eust iamais attendu vn tel malheur? c'est là ou nous pouuons aisément remarquer que rien n'opine en nostre faueur, tout nous est contraire, combien de bonnes familles de ceste ville furent elles deffaites dans ce combat, que de gentils-hommes de marque furent ils enseuelis sous le courant des ondes, Tu le sçais ô (Isle trop fatalle pour nous, tes prairies en sont encor toutes sanglantes, & tes campagnes blanchissent encor des osse-
mens de nos enfans, ainsi nous payons le

tribut de nos dissensions, ainsi le Ciel prend
 nostre deffence, ainsi les destins nous trait-
 tent, ainsi la fortune nous favorise, pere mi-
 serable & infortuné, faut-il que i'acheue
 plus long temps ma vie dans ce labyrinthe?
 Je verray mes enfans mourir à mes yeux,
 ie verray tout mon pays en armes, ie verray
 tous les miens succomber, & ie seray con-
 traint hélas ! d'acheuer en tristesse & en lan-
 gueur continuelle le cours de mes ans: Que
 puis-je esperer à l'aduenir, que des nouveaux
 desordres? que des assauts furieux, que des
 esclâdres insupportables que doivent souf-
 frir ceux qui se rebellent contre leur Sou-
 uerain : Terre creue toy & m'enferme plu-
 tost dans les noires demeures de tes obscu-
 res prisons, que de me laisser languir plus
 long temps dans ces calamitez publiques,
 i'en ay trop veu & à mon grand regret, il est
 temps aussi bien que ie paye le tribut que ie
 dois à la nature: c'est par trop demeurer
 dans ces destours, aussi bien ne puis-je espe-
 rer en bref qu'une ruyne & desolation tota-
 le de ceste ville: Adieu donc ville infortunee,
 adieu peruerse Babel, adieu encor vn coup
 Gomorrhe abominable, que mes os ne re-
 posent iamais dans l'enclos de tes murailles;
 que mon corps aye plustost l'Ocean pour
 sepulture que l'estenduë de tes terres: aussi
 bien veux-je suivre mon fils, puis que la for-
 tune l'a abismé dans les ondes. Mais que
 dis-je hélas ! ou me trāsportent mes souspirs
 ie me

ie me pers dans ma propre perte, & le trop de cognoissance que i'ay de mes malheurs me raut hors de moy-mesme: Ie reuiens encor vn coup à toy Ville miserable, entens au moins mes plaintes, & si i'ay eu quelque fois du credit parmy les tiens, prestel'oreille à mes derniers souspirs: Ie voy avec que regret, les courses & les maux qu'on te fait tous les iours, ie ne puis que ie ne gemisse quand ie voy tant de furieuses charges, tant de sanglantes rencontres & des assauts si preignans qu'on te donne iusques dans tes portes: mais toy-mesme tu en es la cause, tu ne dois reietter ceste faute que sur ton arrogance, tu te bouffis d'orgueil contre les commandemens de ton Roy, tu m'esprises ses loix, tu ne te veux assuiettir qu'à tes propres volontez, & tu n'as autre Dieu que ton arbitre, regarde ce qu'il en peut reussir, considere ce qu'il peut surgir de tes assemblees, prends garde à l'aduenir, tu ne peux long temps persister en tes reuoltes, tu es clouee par mer & par terre, on te ferme le passage par tout, tout le monde coniure ta ruyne, on ne parle que de ton rasement, tu es la fable du peuple, il n'y a Prouince qui ne despise tes deportemens, bref, tu ne peux euitter la tourmente qui va s'escrouler sur toy, & qui te menace d'enhaut, sinon par vn entiere submission de l'obeyssance que tu dois à ton Prince.

Iusques icy tu as veu que tes entreprises

s'esuientent, que tes conseils sont descou-
uerts, que tes reuoltes ne t'apportent que
du dommage, bref, que toutes tes preten-
sions s'euaporent en fumee, & depuis que ce
ieune Prince le Conte de Soissons est venu
inuestir tes murailles, tu peux remarquer &
cognoistre combien de maux, de calamitez
& de furieuses attaques tu as souffertes.

Tes murailles ont estez renuersees, tes
bastions foudroyez, ton temple mis à bas
tes maisons culbutees, & le lieu ou nous
pensions auoir le plus d'assurance & qui
nous seruoit comme d'Asile & de refuge,
sçauoir est, l'Hostel de ville a esté, tu le sçais,
dernierement ebreché d'un coup de canon.

Toutes les sorties que tu fais ne s'esualif-
sent qu'à ta propre perte, les combats &
escarmouehes que tu donnes aux ennemis
ne sont qu'autant de Trophees qui accu-
mulent leurs despouilles & qui augmen-
tent leurs triumphes: Bref, nous sommes
tous les iours en telles alarmes, qui semble
que le Ciel eust conspiré nostre totale ruyne
de tous costez on empiette sur nous.

Tu sçais encor combien l'an passé ce
Despernon vieux Gaulois nous a donné de
trauerses, combien de malheurs nous re-
ceumes de luy & quelles extorsions il fit
en nostre endroit, rauageant generallyment
tout ce qui nous pouuoit apporter quelque
commodité & quelque secours.

Je l'ay veu cent fois à mon grand regret, piller, brusler & bouleuerfer les villages entiers ou nous auons estably nos forces: ie l'ay veu luy mesme au milieu des coups faire des merueilles, aussi a-il esté de tout temps grandement porté contre nous, tous ses desseins n'ont iamais butté qu'à nostre ruyne, & en cecy on a bien recogneu qu'il n'auoit autre interest que l'autorité du Roy qu'il voyoit estre mesprisée de ceux qui demeuroyent icy & qui y ont quelque degré de supériorité.

Depuis voyons tout ce qui s'est passé tant en France qu'Allemagne à nostre desauantage. Ce n'est point d'auourd'huy que ceux qui attirent les estrangers dans leurs pays ont encouru des peines notables.

Nos anciens peres le peuuent tesmoigner & moy-mesme de qui la vieillesse assez signalée parmy vos cercles a encor quelque vigueur parmy nos Eglises & assemblees en ait veu des esperances tres-particulieres. Pour laisser à part tous les vieux haillons de la ligue: iettons les yeux sur les mouuemens de ce temps, combien de traueses nous ont causé nos monopoles & assemblees! quelles besongnes nous ont taillez nos secrettes pratiques avec les estrangers, les rauages de nos biens, vne ruyne de nos possessions & vn estat miserable de toutes nos affaires, qui depuis ont aduancé tousiours à leur declin.

Nostre ville au parauant marchande & vn des plus fameux port de la France pour le trafic a perdu sa splendeur, le lustre qu'elle faisoit esclatter de loin a esté esmoullé & obscurcy par la timidité de plusieurs, qui depuis deux ans en ça n'ont ozé avec assurance traffiquer en nos cartiers, quantité de nos voilles ont esté coulees à fond par l'armee ennemie ou prises à rançon, de façon que si par terre on nous a grandement tourmenté & agité, dressant tous les iours de nouvelles machines contre nos murailles sous la conduite de monsieur le Conte de Soissons: Les Galleres du Roy n'ont point moins de leur costé dressé de machines contre nos vaisseaux, & ainsi nous pouuons estimer avec assurance la mer aussi fatale à nostre ruyne que la terre, & a desia donné & produit de grands tesmoignages.

Combien helas sommes nous esloignez de nos pretensions, combien frustrez de nos premieres esperances, combien la fortune nous a-elle esté reueche en ce que nous auons premedité.

Monsieur de Soubise en qui seul repositoit tout nostre bon-heur, & à luy mesme porté les premieres fatigues.

Nous luy auons confiez nos armées, & pouuions dire de luy ce passage des Pelegrins d'Emaü, *sperabamus illum redempturum*

Israel.

Mais hélas ! nostre esperance a esté terminée d'un piteux object, il ne nous en est reussi que malheur. De tous les autres, tant du Languedoc que des Prouinces circonuoinfines, en qui le mesme espoir auoit pris quelque fondement, quel auantage en auons nous receu, la plus-part se sont mocquez de nous & nous ont abandonnez au besoin: Quand ie considere toutes ces trauerses, ie ne peux que ie ne souspire voyant nostre pauvre troupeau, tellement espars & ce par nostre seule faute, iusques là mesme que nous nous faisons la guerre les vns aux autres, & l'ambition regne tellement parmy ceux qui ont quelque autorité en ceste place, que ce que l'un fait l'autre le renuerse: c'est bien le moyen de demeurer long temps debout. Pour mon regard, ie ne desire que d'estre bien tost priué de la vie, afin de ne voir tous les malheurs qui vont inonder sur vous, aussi bien ma vieillesse ne me peut plus soustenir long temps. Ie tire au declin & au point vertical de ma vie, & si i'ay encor quelque vigueur en vostre endroit, si les parolles & derniers souspirs de celui qui vous a affectionné autrefois peuvent quelque chose sur vous.

Si ma voix languissante & à demie acablée dans les ruynes de la mort, a encor quelque pouuoir en vostre endroit; ie vous supplie

8 Rochelois, & toy Ville infortunee d'ouvrir les portes à ton Roy, & de recourir plus tost à sa clemence & à sa misericorde qu'il a pieusement prodigué en tant d'endroits, que d'attendre les rigueurs de sa Iustice, tu effectueras plus enuers luy par douceur que par la force. Tes voisins t'en loüeront, le Ciel te benira, le Roy te recepura, & moy ie mourray tousiours avec cet aduantage, que de t'auoir veu reduitte au point de la, vraye & entiere obeysance.

F I N.

